

Na osnovu člana 16. stav 2. Zakona o Vladi Zeničko - dobojskog kantona - Prečišćeni tekst ("Službene novine Zeničko - dobojskog kantona", broj: 7/10) i člana 11. stav 2. Zakona o koncesijama Zeničko-dobojskog kantona - Prečišćeni tekst ("Službene novine Zeničko – dobojskog kantona", broj: 5/03) , na prijedlog Ministarstva za poljoprivredu, šumarstvo i vodoprivredu, Vlada Zeničko - dobojskog kantona na 176. sjednici održanoj dana 24.01.2019. godine, d o n o s i

ODLUKU

o dodjeli koncesije za crpljenje i zahvatanje izvorske vode i flaširanje iste na parceli označenoj kao k.č. 2873/1 u K.O. Donji Rakovac, općina Maglaj

Član 1.

(Predmet)

Investitoru „NERKEN“ d.o.o. Maglaj (u daljem tekstu: Koncesionar) dodjeljuje se koncesija za crpljenje i zahvatanje izvorske vode i flaširanje iste na parceli označenoj kao k.č. 2873/1 u K.O. Donji Rakovac, općina Maglaj.

Član 2.

(Način dodjele)

(1) Koncesija se dodjeljuje za crpljenje i zahvatanje izvorske vode i flaširanje iste prema D.B.O.T. modelu (Projektuj, Izgradi, Upravljaaj, Prenesi), a uključuje izradu projektne dokumentacije, finansiranje svih nabavki i nadoknada koje se tiču izgradnje, prikupljanja i realizacije obaveza prema izdatim dozvolama i sporazumima, crpljenja sa odgovarajućim objektima, probni rad i komercijalni rad tokom perioda koncesije i prenos objekata nakon isteka perioda koncesije.

(2) Početak komercijalnog pogona treba biti najkasnije u roku od 3 mjeseca od izdavanja odobrenja za upotrebu objekta.

Član 3.

(Vrijeme trajanja koncesije)

Koncesija za crpljenje i zahvatanje izvorske vode i flaširanje iste po ovoj Odluci dodjeljuje se na vrijeme od 30 (slovima: trideset) godina, računajući početak koncesije od dana početka korištenja koncesije, odnosno početka crpljenja i flaširanja vode, ali ne duže od roka iz člana 2. stav 2. ove Odluke.

Član 4.

(Plaćanje tekuće koncesione naknade)

(1) Koncesionar je dužan da plaća naknadu za korištenje koncesije po ovoj Odluci u visini, na način i po postupku i rokovima koji će se utvrditi Ugovorom o koncesiji.

(2) Za vrijeme trajanja koncesije korisnik koncesije je obavezan da plaća tekuću koncesionu naknadu u visini od 1,5 % od ukupnog godišnjeg prihoda ostvarenog korištenjem predmeta koncesije, koja ne može biti manja od apsolutnog iznosa godišnje koncesione naknade u iznosu od 1.607,70 KM (slovima: hiljadu šestotinasedam i 70/100 konvertibilnih maraka).

Član 5.

(Plaćanje jednokratne koncesione naknade)

Koncesionar je dužan uplatiti jednokratnu koncesionu naknadu u iznosu od 2.331,00 KM (slovima: dvijehiljadetristotinetridesetjedna konvertibilna marka), prije potpisivanja ugovora o koncesiji.

Član 6.

(Raspodjela koncesione naknade)

Naknade iz članova 4. i 5. ove Odluke predstavljaju prihod Zeničko-dobojskog kantona i općine Maglaj u omjeru koji je određen Odlukom Vlade Zeničko-dobojskog kantona o načinu raspodjele i korištenju finansijskih sredstava prikupljenih po osnovu kontinuirane i jednokratne naknade od koncesija ("Službene novine Zeničko-dobojskog kantona", broj: 1/13).

Član 7.

(Posebna vodna naknada)

Plaćanje naknade za korištenje koncesije ne isključuje obavezu Koncesionara da plaća posebnu vodnu naknadu za korištenje voda u skladu sa Zakonom o vodama, odnosno u skladu sa vodnom dozvolom.

Član 8.

(Zaključivanje ugovora o koncesiji)

(1) Zadužuje se Ministarstvo za poljoprivredu, šumarstvo i vodoprivredu da u svojstvu Koncesora, na osnovu ove Odluke i odredaba Zakona o koncesijama, zaključi Ugovor o koncesiji sa Koncesionarom, kojim će se urediti međusobni odnosi, prava, obaveze i odgovornosti, uz prethodno pribavljeno mišljenje Kantonalnog pravobranilaštva.

(2) Ugovor o koncesiji iz prethodnog člana mora sadržavati obavezu Koncesionara da prilikom izgradnje objekta angažuje 100% učešće domaćih privrednih društava.

(3) Koncesionar je dužan prije potpisivanja Ugovora o koncesiji, a najkasnije u roku od tri godine od donošenja ove Odluke, obezbijediti odobrenje za građenje objekata u funkciji korištenja predmeta koncesije.

Član 9.

(Stupanje na snagu odluke o dodjeli koncesije)

Ova odluka stupa na snagu danom donošenja i objavit će se u „Službenim novinama Zeničko-dobojskog kantona“.

Broj: 02-25-1193/19.

Datum, 24.01.2019. godine

Zenica

PREMIJER

Miralem Galijašević

DOSTAVLJENO:

1x Ministarstvo za poljoprivredu, šumarstvo i vodoprivredu,

1x Ministarstvo finansija,

1x „NERKEN“ d.o.o. Maglaj, (putem Ministarstva),

1x Općina Maglaj, (putem Ministarstva),

1x „Službene novine Zeničko-dobojskog kantona“,

1x a/a